



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 3

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8

TIPRA den yaritepnürtemi 'Tipraland' takhangba pusemstsüla: Pradyot

UK nung Nawaz Sharif indang Visa atsülangtsü memelar



VOL. XVIII NO. 294 (ADOK 294) DIMAPUR

KÜPTOKNÜ (SATURDAY)

LUROI (AUGUST) 07, 2021 ₹ 5.00

COVID-19 Nagaland: 110 dak putet, 79 taneptsü angu & 1 asü

Kohima, August 6, 2021 (TYO): Hokolbarnü Nagaland nung nisung 110 dak COVID-19 aliba putet aser parnok züngsema nisung 28,445 kümogo.

"Tanü nisung 110 dak COVID-19 putet. Parnokji Peren nung 33, Kohima nung 26, Dimapur nung 21, Longleng nung 10, Mokokchung nung 9, Zunheboto nung 5, Tuensang nung 3 aser Kiphire, Mon o Wokha nung kaka (1) lir" ta Integrated Disease Surveillance Project atema State Nodal Officer, Dr Nyanthung Kikon-i ashi.

"Tanü COVID-19 puteta alir nisung 79 taneptsü angu. Parnokji Kohima nung 42, Dimapur nung 10, Mokokchung nung 11, Wokha nung 6, Kiphire nung 4 aser Longleng o Peren nung asemsem (3) lir. Parnok züngsema nisung 25,682 taneptsü nguogo" ta paisa ashi.

Nagaland nung COVID-19 nungi taneptsü angur 90.28% lir aser tang nisung 1,370 anepaludar, ta Dr Kikon-isa shisem.

Hokolbarnü Peren nung

COVID-19 puteta alir ka asüba züngsema tasür 582 kümogo, saka nisung 14 bo tanga tashidak ajanga asü, ta paisa ashi.

"Tang tashi nung COVID-19 alitsü akok ta temolung melemi bilemba sample 274,036 tendangogo. RT-PCR ajanga 103,865, TrueNat ajanga 69,397 aser Rapid Antigen Test ajanga 100,774 tendang" ta Dr Kikon-isa metetdaksü.

"Brihostibar tashi nung nisung 627,615 nem COVID-19 vaccine indang dose 784,436 agütsüogo" ta State Immunization Officer, Dr Ritu Thurr-i ashi.

Vaccine agirtemji frontline workers 60,827, healthcare workers 15,977, arishi küm 45 ser tempur 187,331 aser arishi küm 18 nungi 44 tsüingda alir 363,615 lir, ta paisa ashi.

"Vaccine agirtem rongnungi nisung 156,686-i dose anaprong agiogo. Parnokji frontline workers 40,571, healthcare workers 12,573, arishi küm 45 ser tempur 103,156 aser arishi küm 18 nungi 44 tsüingda alir 386 lir" ta Dr Thurr-isa ashi.

COVID-19 ajanga Nagaland rongsenketzung tia kanga majung kümogo

Kohima, August 6, 2021 (TYO): COVID-19 wara ajanga takoksa jenti bentsür aruogo aser 2020-21 tsüingda state rongsenketzung Rs.1013.11 crore tashi ajema kümdaktsüogo, ta Nagaland Chief Minister Neiphiu Rio-i ashi.

Hokolbarnü State Assembly nung Planning & Coordination, Land Revenue and Parliamentary Affairs Minister, Neiba Kronu-i Post COVID-19 economic recovery indang onük benoka jembidang Rio-i iba osang metetdaksü.

"COVID-19 wara ajanga tetsükdaktsü aser tayongzükba aika bentsür aruogo, saka asenoki iba ya adena oa rangloksüla. Asenoki taküm aser mapa kümzüksü atema inyaka aotsüla. Lockdown aser tenokdangba balala ajanga alima aser linük rongsenketzung nung timtem bentsür aruogo aser iba nung Nagaland-a densema lir" ta Rio-isa metetdaksü.

"Financial year 2020-21 mapang "Road Map for Economic Development of Nagaland post COVID lockdown" ta ser Rs. 8062.64 lakh indang mapatong 23 tashi NEC dangi aben. Iba nungi NEC-

i Rs. 3117.00 lakh indang mapatong 12 agizük. NEC-i mapatong ajak tenzüksü shiogo aser 1st Installment ama Rs. 764.00 lakh agütsüogo" ta Rio-i ashi.

COVID-19 wara tanabubana nung Nagaland asoshi tayongzükba aika bentsür aru aser sorkari rongsenketzung jenjang meraksatsü aser ano kasa mapang nung sensotem COVID nungi jenbua ayutsü indang mapa inyak, ta Rio-i ashi.

"Nagaland nung yimdaklirtem atema tongtipangtiba mapaji agriculture & allied activities lir aser iba jagi sorkari tenokdangba agütsüdag agriculture & allied activities aser construction dak sendakba maparen menokdang" ta CM Rio-isa ashi.

Naga nunger tsünütetba yokdoktsü atema March 2 nungi Air Cargo services tenzükogo, ta paisa shisem.

"2021 nung State Plan size ji Rs.639 crore liasü aser iba nungi 15% ajema sülen Rs 572 crore aküm. Ajisüaka, terenlok maparen ajungkettsü atema State plan size Rs 700 crore kümogo aser iba ya yaküm State Plan outlay nungi 22% teimba ajungketba lir" ta paisa

metetdaksü.


Tesüiba ita 9 tsüingda Health & Family Welfare department nung mapa 500 tema nung nisung aniokogo aser tawa Group A, B, C aser D Government employees 1517 anioktsü atema temelaba agütsüogo. Iba ajanga küm nung itasen nung Rs. 56.85 crore enoktsü, ta Rio-isa ashi.

"Naga nungeri mapa inyakba sobaliba ano mangatep lir kechiyong non-Naga nungerbo arua mapa inyaker saka local nisungtembo mapa mangur ta ashir" ta paisa tebilemba lemsatop.

"Government Departments aser citizens services ajak sabang ka nung dendaktsütsü atema Nagaland State Advanced Enterprise Architecture (NSAEA) project inyakdar aser iba yagi linük nung information technology tsütsü tangar dang nungi advanced state akümtsü" ta CM Rio-isa metetdaksü.

Taküm Hornbill festival amongtsü aser iba ajanga tourism tashi itshitsü, ta paisa ashi. "Nagaland nung nisungtembo vaccine agir aser tagitsüpur 50% shi kati dose kabosa agiogo. Tarutsü nung COVID teblemetsü atema state renema lir" ta Rio-isa ashi.

NBCC-i Clean Election Movement 2023 tenzükogo



August 6, 2021 nü NBCC Platinum Hall, Kohima nung Peace Activist Niketu Iralu-i Clean Election Movement tenzükba sentong nung jembiba angur.

Kohima, August 6, 2021 (TYO): Nagaland Baptist Church Council (NBCC) aser Angami Baptist Church Council (ABCC)-i Hokolbarnü Clean Election Movement (CEM)

tenzükogo.

2023 State General Election atema "My Vote, My Future" omen nung ajemdaker iba sentong tenzük.

NBCC-i "Clean Election

Movement" ta kanga dang shitak jatetogo kechiyong iba ya election maparen nung temelenshi bener arutsü atema lir, ta Peace Activist Niketu Iralu-i ashi.

"Sorkar ketdangsübaren ajungtsü aser iba ajanga rongsenketzung ainba den loktiliba tashi aittsü atema NBCC-i Khristantem dang election maparen merükteta ayutsü ayongzükka arur. Asen tangatetba, yimyatsüya aser tanüla jenjang mejungra, rongsenketzung jenjang tamajungba akümtsü melena ozüing alema inyakba aser nisung tepsettepba adoktsü" ta paisa ashi.

"Asenoki clean elections atema raratsü sangdongogo aser tanü asen loktiliba tia tamajung kodang mamadoki asenoki temelenshi bener arutsü atema inyaktsüla" ta Niketu Iralu-isa metetdaksü.

Naga linük atema inyakba maparen raksaogo aser iba ajanga asen nübertem raksatsür.

Iba denji asen state sorkari raksadokogo, ta paisa ashi.

"Nagaland nung arogotem nung sayutsü atema Arogoi Naga shisashirtem jatepa renemtsüla. Ibaji Kotak nung aliba ama alima nunga Tsüingrem yimlij kechi? Ibaji kong lir? aser Ibaji kodang asütsü? ta tasüingdangba asem indang renemtsüla" ta Iralu-isa ashi.

NBCC nung arogo shia nem nisung 3 mesüra 4 adenba counselling/advisory cells tentettsüla aser parnoki election dak sendakba onüktem jembitsüla, ta Iralu-isa tebilemba ka lemsatop.

"Yimtenren mapa nung shilem magirtemi Khristantemibo politics nung pila alitsüla ta bilemer, kechiyong parnoki Khristan tamangba den yimtenren meputep ta ashir" ta NBCC CEM Convenor Dr. Villo Naleo-i ashi.

"Ano, nisung kari politics ya temenen anungi arogoi shilem magi tajungba ta ashir. Ajisüaka, külen political activists-ibo

Khristantem politics nung shilem agitsüla kechiyong Laishibai lokti aser yimtenren den jembir ta ashir" ta Dr. Villo-isa metetdaksü.

"Politics ya temenen masü saka asenoki politics temenen kümdaktsür, kechiyong asenok alizüing tai lir aser nübertem madak yimsü asütsü atema tai inyakyim benschir" ta paisa ashi.

"Nagaland nung Baptist Arogotem Clean Election Movement nung shilem agir kechiyong Nagaland nütsüing yongsük nung Khristantem 90% dak tema lir. Iba ama tia ka nung Khristantem politics nung shilem magira, Khristantem teimba sür aliba state ka nung non-Christian sorkar ka nem maangka agütsür asütsü" ta Dr. Villo-i ashi.

Iba maparen nung NBCC kija masü saka tanga Khristan tamangertem, NGOs, Civil societies, kaketshir aser tetsür tentetemia shilem agir, ta paisa ashi.

(Maneni tapak 10 nung...)

Covid putetaka meshirangertem pei kidang takdang balaka nung mongdaksür, idangji -

Pei alidak aser ayipdak mopong aittsüsa kichiba (window & ventilation) lapoka yuang.

Akok tashi süngjanglijang aser süngolemba agi tua chiyongtsü tajung chiang aser tzü aser juice jemang.

Pei meyong mobile phone, kumesü aser toothbrush nunger ama melentepa tamshi.

Mozü achitsü agüja lira, aji shitak chiang.

Tango junga mesashiteta, teku ashiba, aketba aser temang metaba timtem lira yakta doctor bushiang.



Tir Yimiyim



Jangpetkong Pastor aser Associate Pastor Women Telongjem (JPAPWT) ajanga lemtetba ama Waromung Baptist Arogoi ayonga kilometer 10 (Waromung nungi Yimjenkimong artsu aser Debuia artsu) tashi PWD road kanga junga inyakogo nübo ajak agi 233 aser Pick-up teku (9) tenla agüja yanglu, Arogoi nübo aser rongsen tenlar ajak dang pelar ta WBC Pastor Wb. Meren Mollier ajanga metetdaksü.

Lotha Eloehoho ajanga COVID-19 awareness sentong ayongzük

Dimapur, Luroi/August 06 (TYO): Lotha Eloehoho ajanga August 5, 2021 nü Town Hall, Bhandari nung COVID-19 awareness sentong ka ayongzüka agia liasü.

Iba sentong nung Additional Deputy Commissioner, Bhandari, Tiameren Chang, NCS ajanga jembiba mapang, COVID-19 tashidak agi tesem ajunga sünger aliba mapang district administration, CMO Wokha kübok medical department aser sendaktepa aliba department balalai Bhandari Sub-Division den yaritepba atema pelaba lemsatepa liasü. Parnok teyari ajanga Bhandari Sub-Division ya takok anguba block ka kumdaksür, ta pai ashi.

Danga state den arütsü talangka lir asünung Bhandari sub-division nung nüburtem

nem aginüba ama health services agütsüsü asoshi tali meranga inyaksü nüngdaker, ta pai ashi.

Additional Deputy Commissioner, Bhandari, Tiameren Chang-isa frontline worker, ASHA aser health worker dang yimdak-yimtsüngtem tashinung nüburtem osang shidak amshia COVID-19 tashidak tendangsü tsüpuba aser mozü agitsü tsüpuba samadaksüsü ajungshia liasü.

Chumdemo Kikon UNDP, CMO Wokha ajanga COVID-19 mozü indang jembiba mapang nüburtem olulu nem manisadaksüi osang shidak angatetdaksüsü nüngdak, kechiaser mejangjaba osang tiazü prokshiba ajanga nüburtem tsüpua bilemer aser mozü agitsü memolunger, ta

ashi.

Measles, chickenpox mesüra rubella mozütem ama nisung meimchir temang anema yutsüsü asoshi mozü yangluba ajunga nung nüngdakba mera agia tendanger amshir, ta pai ashi.

COVID-19 tashidak wara den raraba nung tetsürtemi jenjang balala nung shilem agiba asoshi tenüngsang agüja jembiba mapang, Lotha Eloehoho tir Zuchobeni Ezong-i ashiba agi, tanü tensa nung tashi tait, tasüngtet aser terenlok lokti ka atema tetsürtemi shilem agitsü kanga tongtipang lir.

Lokti asoshi ajaki maneni meranga inyaksüla aser iba tashidak wara azüokba nung shilem agitsüla, ta lai ayongzüka liasü.

Iba sentong nung Vice President, Lotha Eloehoho, Renboni Jami menden liasü.

NBSE ajanga Independence Day atema metetdaksür

Dimapur, Luroi/August 06 (TYO): Department of Education and Literacy, Ministry of Education ajanga tesüiba mapang metetdaksüba ama India nüjiso ngur küm 75 ajungba benjong - Azadi Ka Amrut Mahotsay nüngtem nung Government of India-i sentong balala ayongzüka lir.

Aser yamaji aruya aliba sentongji "Rashtragaan" (National Anthem) ken tena

webpage <https://rashtragaan.in> nung upload asütsü.

Iba dak sendakba nung Nagaland Board of School Education ajanga NBSE nung register süa aliba kaket reju (Government aser Private) ajunga indang tekolaktem dang pei tanur (kaketsür) ajak, tsürabur, tesayur aser non-teaching staff ajunga dang iba sentong indang metetdaksüsü shiogo.

Iba sentong nung shilem agirtemi website <https://rashtragaan.in> nung oa pei sasa National Anthem atema mangaoka aliba upload asütsü metetdaksü.

Iba sentong nung shilem agitsü atema August 14, 2021 ya tatembang alitsü. School tem dang pei tanur aser staff tem iba sentong nung shilem agitsü asoshi ajungshitsü metetdaksü.



Project Director, DRDA Mokokchung-i Mokokchung DC & DTFC Chairman, Limawabang Jamir nem Covid-19 anema raraba nung amshitsü atema nungdakba osettsüset kar tenlaba den DRDA-i Covid-19 dak sentakba nung nüburtemi meteta alitsü asoshi oshi ana (Ao & Sumi) nung adokba IEC shitipak kar sayatsüba mapang tangokba noksa nung angur. Item shitipaktemji Mokokchung district kübok yim 87 nung kilen shia lema agütsüsü, ta osang ajanga metetdaksü. Mokokchung, August 6, 2021

Tanü NFHRCC senden amentsü

Dimapur, Luroi/August 06 (TYO): Nagaland Foot Hill Road Coordination Committee (NFHRCC) senden August 7, 2021 anepdang 10:00 ako nungi

ta AGS, NFHRCC, Chenithung Humtsoe ajanga sangdong ka nung ashi.

Department of Tribal Affairs indang website sayaogo

Anungji iba senden nung züngsem ajak medema arua adentsü mepishia metetdaksür, ta sangdong ajangasa ashi.

Dept. of Tribal Affairs indang website sayaogo

Dimapur, Luroi/August 06 (TYO): Minister, Tribal Affairs and Higher Education, Temjen Imna Along ajanga August 6, 2021 nü Chief Secretary indang Conference Hall, Kohima nungi Department of Tribal Affairs indang official website www.tribalaffairs.nagaland.gov.in sayatsüogo.

Iba website sayaba sentong nung jembiba mapang, department amenoker küm anabuba nung mejakloka yiogo aser State nung nüburtem ajangzüküsü asoshi inyaker, ta Minister Along-i ashi.

Nagaland nung Scheduled Tribe pur ajungkettsü asoshi scheme aser sentong balala Tribal Affairs department

tentetba atema pai Nagaland Chief Minister dang pelaba lemsatepa liasü.

Department of Information Technology and Communication ajanga department atema kanga nüngdaka aliba website yanglutsüba asoshia pai pelaba lemsatepa liasü. State nung aliba nüburtemi iba website tasenba ya amshitsü imlar, ta Minister Imna Along-i ashi.

Department ajak nung website shidak alitsüla aser nüburtem asoshi osangtsüsang shidak item website nung agütsüsüla, ta Chief Secretary aser AHOD Tribal Affairs, J Alam, IAS ajanga ashi.

Website ajanga ochishia inyakba nung yarir aser iba mechi website ya yanglu, ta pai ashi.

Meteorological Data of Nagaland 2019-2020 tasenba sayaogo

Dimapur, Luroi/August 06 (TYO): Soil Survey & Land Use Planning Wing ajanga adokba Meteorological data of Nagaland 2019-2020 version tasenba kuma yanglushir Director, Soil & Water Conservation Department, K. Zhekheto Awomi ajanga pa indang office chamber nung saya liasü.

Iba sentong nung Deputy Director & Schematic officer, Rongsenlemzung-ia jembiba liasü. Meteorological data bendenba maparen ya aluyimba tsütsü Meteorology kanga tongtipang süa amshiba amshiba ajanga tenzük, koba alima tzü-mopung melenba

ajanga temelenshi balaka bener arutsür.

Tang Department kübok Nagaland tesem balala nung Meteorological stations 17 lir aser mezüngbuba ya 1981 küm amenoka liasü. Item station yagi anogoshi tzüngsang-mopung asadanger.

Anogoshi office balala nem data agütsüba dak alaka India tesem ajungalen nungi research agir, scientist, engineer, Land and Water User Departments amalai project balala yanglutsü, ki-ojen yanglutsü, sentong balala yanglutsü, alimar yimya agi teraksa bener arutsüba nung yaritsü asoshi teti amshir.

Nagaland Medical College, Phriebagei nung süngdong atem

Dimapur, Luroi/August 06 (TYO): Phriebagei, Kohima nung Medical College tasen ka amenoktsü aliba nung tzü-mopung tajung lidaksüsü nükjidong nung Department of Forest, Environment and Climate Change ajanga iba Medical College telungzük aser temeket nung atemtsü asoshi süngdong 3,000 tenla agüja liasü.

Iba sülen Phriebageito nung Nagaland Medical College amenoktsü aliba tesem nung August 6, 2021 nü süngdong atemba sentong ka ayongzüka agia liasü.

Iba mapang Department of Forest, Environment and Climate Change ajanga mapa tajung inyakba asoshi Minister, Health & Family Welfare, S.

Pangnyu Phom-i tenüngsang agüja liasü.

Tzü-mopung asoshi mera tilaka agiba ya Medical College kisüng atema masü saka ajak atema lir, ta pai ashi.

Iba sentong nung Minister, S. Pangnyu Phom aser Principal Secretary, Health & Family Welfare Amardeep, S. Bhatia, IAS den Directorate nungi ketdangsür aika dena liasü.

Maneni Directorate of Health & Family Welfare nungia iba sentong nung Dr. I. Talitemsula Jamir (Mission Director), Dr. Visasieu Kire (Director), Dr. Thorusie Katiry (Director), Dr. Theyiephrezo (Director) nungertem dena liasü.

TIPRA den yaritepnürtemi 'Tiplaland' takhangba pusemetsüla: Pradyot

Agartala, August 6, 2021 (Agencies): The Indigenous People's Regional Alliance (TIPRA) atema tongtipangtiba teinyaktsüji 'Tiplaland' asütsü, ta Chairman Pradyot Debbarma-i metetdaksüogo.

TIPRA den tesentaktep yunüba political party-i tamasa 'Tiplaland' takhangba agizüktsüla, ta Pradyot Debbarma-isa ashi.

"Onok indang tongti takhangbaji 'Greater Tiplaland' lir. TIPRA den tesentaktep ayutsü jangraba political party-i iba takhangba pusema onok dangi shidi zülutsüla" ta paisa ashi.

"Tebang agi nangzükba nung tetezü kecha mali. Ni Tiplasa nunger mashioktsütsü. Tezüluba nung shidi mangu tashi ni magizüktsü" ta Pradyot-isa metetdaksü.

"Onoki BJP, TMC mesüra CPI-M den jembitsü molunga lir saka parnoki onoki akhangba atema telemetba agütsütsüla" ta paisa shisem.

TMC lennir Kunal Ghosh-i yashi TIPRA chairman Pradyot Debbarma den Tripura nung yimtenren tensa indang olemtepsü jaokba sülen pai iba osang metetdaksüogo.

"Ni Kunal Ghosh den

metetteper mapang talangka arur. Ni pa dang Tripura nung yimtenren tensa indang osang shiogo" ta Pradyot Debbarma-isa ashi. Ajisüaka, tesentaktep ayutsü indangbo kecha mejembi, ta paisa shisem.

TIPRA-i "Greater Tiplaland" takhangba nung ajemdaker Tripura Tribal Areas Autonomous District Council (TTAADC) sorkar kütmeta ketdangsür.

Tripura nung BJP sorkar atema TMC ya tashitait opposition ka ama kümogo aser külen lisopurtem alidak IPFT-i timtem agütsür.

Meghalaya BJP MLA AL Hek Adviser shim

Shillong, August 6, 2021 (Agencies): Meghalaya chief minister Conrad Sangma-i taoba health minister aser BJP MLA AL Hek Adviser asütsü shimogo.

"Meghalaya Governor-i Meghalaya Chief Minister atema Adviser inyaksü asoshi Alexander Laloo Hek shimer" ta

Chief Minister's Secretariat ajanga metetdaksü.

Chief minister Conrad Sangma-i state cabinet nungi Hek agien ta BJP-i tai tongloksüba sülen AL Hek Adviser ka ama shimogo.

CM Conrad Sangma-i parnok den masüngdangtepi cabinet

nungi AL Hek agien, ta Meghalaya BJP-i tai tongloksüba liasü.

Külen, AL Hek-ia pa cabinet nungi agienba atema mepelaba metetdaksüogo.

"Ni cabinet nungi magiendang chief minister-i kü den jembitsüba liasü" ta Hek-i ashi.

Assam nung tebei drugs alitsü atema jabaso yokdok

Laharighat, August 6, 2021 (Agencies): Assam kübok Morigaon district nung tebei arishi küm ana ser tesadang jabaso ka drugs alitsü atema yokdok. Iba ya Morigaon kübok Laharighat yim nung atalok.

La kinungbo Aminul Hoque-i Goroimari nung alir Sajida Begum dang drugs achitsü atema Rs 40,000 agi yokdok ta Rukmina Begum-i ashi.

Aminul Hoque ya Barbari nung alir aser taoba küm 3 tashi mozü chia arur ta Rukmina-isa ashi. Aminul-i mozü achiba dak alia par kidang teküp ayokba maparen inyaker, ta laisa metetdaksü.

"Ni pa dang aiben drugs machitsü indang shiogo, saka pai tashi manga. Pai ni reshikangshi aser kübo'er kidangi yok. Iba sülen nungi ni kübo'er kidang dang liyonga arur aser ita pezü jungogo" ta laisa ashi.

Anogo ishika tejakdang

Aminul-i Rukmina semdang aser idangji tanur indang Aadhaar card yanglutsü atema ta ser jabaso anir saka anogo ana-asem süiaka Aminul-i jabaso anir maru.

Iba jagi Rukmina-i lar kinungbo'er tsuraburtem dang asüngdangtepdang parnoki tanurji kong lir'ar memetet ta langzü.

Rukmina-isa lar kidangertem dang asüngdangtepdang Aminul-i drugs alitsü atema Sajida Begum dang tanur yokdokba osang angazük.

Iba osang nung ajemdaker lai nisung kar anir Sajida'er kidang oa lar jabaso meshi saka Sajida-i agütsütsü memolung aser "kü sen meyipa kua aser iba sülen jabasoji agiang" ta langzü.

Rukmina-i Laharighat Police Station nung Aminul aser Sajida Begum anema ken o benok aser police-i tena pur Rukmina nem tanurji agütsü.

Assam Congress-i Olympic medallist Lovlina nem Rs 3 lakh agütsütsü

Guwahati, August 6, 2021 (Agencies): Assam Congress-i Olympic medallist Lovlina Borgohain nem Rs 3 lakh senpet agütsütsü metetdaksüogo.

Hokolkbarnep Assam Congress president Bhupen Borah-i iba osang sangoktsü.

"Tokyo Olympics 2021 nung otsü tasen yanglua medal anguba atema Lovlina Borgohain nem Rs 3 lakhs agütsütsü" ta Assam Congress-i Twitter nung metetdaksü.

Külen, Assam sorkaria Lovlina Borgohain DSP shimtsü

imlar.

Tokyo Olympics nung Lovlina Borgohain-i bronze medal anguba ajanga India aser Assam nem konang bentsür aruogo.

Vijender Singh aser Mary Kom na sülen Lovlina-i India asoshi Olympic medal tasembuba angu.

Arishi küm 23 tain Lovlina Borgohain-i Olympic Games nung Taiwan tsür aser taoba world champion Nien-Chin Chen madak takok ngua semi-final atong.

Indian Film Festival of Melbourne 2021 nung Assamese film "God on the Balcony" ajanga Nominations asem ngua lir. Iba film ya Best Indie film, Best Director aser Best Actor category tem nung shima lir. Indian Film Festival of Melbourne 2021 ya küm shia ayonga amonger aser tan ita online ajanga 12 buba benjung amongtsü sentong lir.

GOVERNMENT OF NAGALAND
DIRECTORATE OF EMPLOYMENT, SKILL DEVELOPMENT & ENTREPRENEURSHIP
NAGALAND: KOHIMA

NO.DET-2/14/2001 (PT-1)/418 **Dated Kohima the 6th Aug'2021**

ADVERTISEMENT

Reference to Advertisement letter NO.DET-2/14/2001/PT-I/336 dated 3rd July' 2021 few seats are available in the following trades under the following Govt. ITIs. Eligible candidates may contact Principal/ Vice- Principal of the concerned Govt. ITI for selection/ admission along with relevant documents (first come first basis).

*All other conditions remain the same as advertised earlier.

Sl.No	TRADES	DURATION OF COURSE	MINIMUM EDUCATIONAL QUALIFICATION	NAME OF GOVT. ITIs
1.	Dress Making	1 year	10 th Passed	Zunheboto.
2.	Hair & Skin Care	1 year	10 th Passed	Dimapur, Kohima, Phek
3.	Secretarial Practice	1 year	10 th Passed	Dimapur, Mokokchung
4.	COPA	1 year	10 th Passed	Dimapur, Mon, Wokha, Mokokchung, Zunheboto.
5.	Mechanic Diesel	1 year	10 th Passed with Mathematics	Kohima, Tuensang
6.	Plumber	1 year	8 th Passed	Kohima, Phek, Zunheboto.
7.	Knitting	1 year	8 th Passed	Kohima, Dimapur, Mon
8.	Cutting & Sewing	1 year	8 th Passed	Phek, Wokha, Mon, Tuensang
9.	Carpenter	1 year	8 th Passed	Phek, Wokha, Mon, Kiphire, Tuensang.
10.	Mason	1 year	8 th Passed	Kohima
11.	Welder	1 year	8 th Passed	Kohima
12.	Sewing Technology	1 year	8 th Passed	Dimapur, Kiphire.
13.	Fitter	2 year	10 th Passed with Maths & Science	Kohima
14.	Mechanic Motor Vehicle	2 year	10 th Passed with Mathematics	Mon, Phek, Wokha, Mokokchung, Tuensang.
15.	Electrician	2 year	10 th Passed with Mathematics	Wokha, Mokokchung, Tuensang, Mon, Zunheboto
16.	Draughtsman (Civil)	2 year	10 th Passed with Maths & Science	Mokokchung
17.	Information & Communication Technology System Maintenance (I&CTSM)	2 years	10 th Passed with Maths & Science	Kohima
18.	Machinist	2 years	10 th Passed with Maths & Science	Kohima.

Sd/-
CHIDEN YADEN
Director

Issued by DIPR

Mirabai Chanu-i truck driver tem dang pelaba metetdaksü



Imphal, August 6, 2021 (Agencies): Manipur nungi Olympic Silver medalist Mirabai Chanu-i truck driver tem dang pelaba sayuogo.

Mirabai-i Khuman Lampak nung practice sessions agi aser ibaji lar kidang nungi kilometre 24 shi pilar lir. La iba tesemi aodang truck driver temi la anirsa ao aser lai parnok dang pelaba video ka social media nung kanga prokshir.

Lai truck driver tem dang pelar ta sayutsü atema parnok lar kidangi jaoka liasü.

"Ni nenok ajak danga kangasa pelaba metetdaksür. Nenok teyari medeni ni iba jenjang metongtetla. Ni nenok ajak dang ajurutepa pelar ta shinüa liasü aser tanü item tesüiba anogotem bilemetdang nüktzü alua bilemer" ta

Mirabai-i video nung shia lir.

"Nenok ajanga ni mapang shitak nung practice asütsü tonga otet" ta laisa ashi.

Mirabai Chanu-i truck driver tem den tesentaktep tajung yanglu kechiyong parnoki la stadium tashi anir ao aser la kümzüka ayu. Talisa parnoki la dang nungi taa kecha magi.

Mirabai-i parnok nem Manipuri sobaliba sü tabentsü 'khudai' agütsü.

Tokyo nungi lar ki tonga aruba sülen Mirabai-i küm ana sülen lar kibong den külemi amongba atema kanga pelar ta ashi.

Laisa lar tsuraburtem dang "Ema aser baba nati ni iba jenjang tongtettsüsa bendanga agüja yariba atema kanga pelar" ta metetdaksü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

LUROI (AUGUST) 07, 2021

Light aser lenmang agüjang

Küm shia kaketrejutem balala nungi, talisa, class ter aser terana purtemi anir kaketshirtemi takok tajung anguba osang angashidang asenok ajak pelateper aser kaketshirtem tajung adokba jagi asenok ajak mulung anisüngzüka teimla agütsür. Ajisüaka, parnok metetba aser bilembaji mapa küma inyaktettsüsa government-i parnok nüngdakba magütsütetra, parnok dak aliba tashitemet aser shisatsüji asen lima nung tagitsü küma mamshitetsü. Iba jagi asenoki lanur tazung tashir aser temeteterem aika asen lima nung mapa maka kazüba angur aser aika bendang lima bushia oagi, England, America, Germany, Japan aser Gulf country-tem tashi nung oa mapa inyaker. Atangji, zünga shia meteterem bendang limatem nung oagi inyakbajia junger saka iba jagi asen lima nung alir nübortembo renloknüseta merenloktet akoksar. Item ajakji asenoki lanurtem nem parnok dak aketba sempet aser tashitemet amshia mapa inyaktettsüsa nüngdak magütsütetba ajanga lir. Tanü lanur tazung-tashirtem den jembira parnok aikati government mapa nung masü saka peisasa pei akok mapa tilaka tenzüka inyaker saka meinyaktetter, kechiyong asenoki parnok mapa tenzüktettsüsa lenmang melapokstetter. Aji oda, asenoki government mapaa magütsütetter aser peisasa pei temetetba aser sempet yari mapa tenzüka aotsü asoshia meyaritetter ta asayatsü atema jungjunga renemtsü ser nung, asayadak merenemtsü amai, tapayutsüka lanurtem dak aketba tashi, sempet, shisatsü aser temetetba amshidak maka akoksadagi. Aiben asenoki lanurtem nem mapa agütsütsü jembidang, government nung renema akaba mapa kar agütsütsü indang bilemer mesüra alushi tulu lirji peisasa mapa tenzüka aotsü asoshi ajungshir. Ajia shitak saka lanurtem government mapa nung inyakba agi asen lima takar küma merenloktettsü aser lanurtem mapa tenzüka inyaktettsüsa nüngdak magütsü tashi tajungshi o kisüng agibo mapa metenzüktettsü. Item nüngdak aser tebilemstütem indangji kodang bilemdangdir, tanü lanurtem nüngdakbaji government mapa nung inyaksü atema "Appointment Order" masü aser senotsüa masü saka parnok mapa tenzüksü atema nüngdak tulutiba anaji electric light (power) aser gari lenmang lir. Nüngdak ana dak ya alaka tanga nüngdaktembo lanurtem kolok aser parnok dak aliba shisatsü aser tashitemet agi apiteta inyaktettsü. Ajak atema tasak kaji, tanü tashibo kisünggibo nübortem nüngdak peria agütsüsa electric tashi madokdaksütettsü. Iba amaji yimkong jajatsüba lenmang tulu aser talangbo kijai meinyaktettsü, anungji tanga nüngdak magütsütetyonga government-i lanurtem nem light tashibo peria agütsütettsüla aser gari lenmanga National aser State Highways dang masü saka tesem ajaklen alu lenmang dena arem nung oagi mapa tenzüktettsüsa yanglutsütsüla. Tanü lanurtem aikati pei pei yari business tenzüknar saka factory aser workshop lapoka mapa tenzüksüsubajibo yutsür, light junga maruba agi Xerox dokan-a dena junga moutetter aser hotel tilakata junga lapoka moutetter. Ano, Naga nung lanurtem aika pei tsüraburtemi toktsüba alushi tulu lir, saka ilen jagi oset bener aotsüsa lenmang maka, anungji electric tashi angutsübo otsü maka ta farming aser industry mapa nung kibur kümer nisung aika nem mapa agütsütsü purtem agi zünger mapa mangurtem kümer timtemdaksür. Tanü asen loktiliba tipdema melitetba kuliji aji ka asütsü. Zünger mapa mangur ta asüba o ya kodang jungjunga bilemdangdir taaktsü o lir, anungji taak maram lanur tajung aika tamajung küma aoba asenoki agur. Itemji soitsüla aser item takütememji kümzüktsüla. Parnok mapa mangubaji parnok junga mazüng agi mesüra azümesenba kija agibo masü saka parnok nem inyaksü lenmang melapoktsüba ajanga lir. Iba timtem aser taiji angateta government-i lanurtem tekolok aser tetsüng teben arakzua mapa inyaktettsüsa parnok nem light aser lenmangbo agütsütettsüla. Iba jagi parnok asoshi khen chir maka akümtsüsa ango agütsür masü saka teti ango den chiyongtsüsa ango aputsüba lenmang sayur asütsü. Itemjia magütsütet ser asenok lenirtemi pei agütsü ali kimong indang dang bilemra, lanurtemi asenok kija Nagaland nung toktsür bendang lima tapu terna nung oagi senso küma mapa inyaka ali tenzüksü. Atangji, Nagaland yanglushitsüba ya mapa tasak ka masü aser lanurtem nüngdakji ita petinu nung aliba bener alua agütsütsüba masü saka asen ket nung parnok meyong yua akaba agütsütsüba indang jembir. Aji oda, asenok teraka ochi ashi tenzüknar nung memeteti tesem ajaklen light kodanga maseptsüsa arur alitsü aser gari lenmanga sademsadema lapoker alitsü. Idangjiang asen lima nung mapa inyaker meinyakma adoktsü, anungji lanurtem chiyongtsüa mapang mangutsü.

OLEMSABANG

Asangur ka aser Aier ka taküm nung Tsüngremer Sentongtem ataloka aoba indang otsü tatsüka lemsateper

R. Imkong Lkr, Mangimen

Khen mapang ka Asangur B.A Graduate student kati pa taküm suita alitsü atema Govt. Department kar nung mapa tila ka tanga ngudisü ta ser interview aiben agüja aru, saka kenü tanga takok menguteti aliba mapang ka nung pa tu joko tezü danga toker kechianga mesayangi alitang, kenü anogo par tsüraburtem aluleni oadoker aliba mapang ka pa yipden nung mangataker kanga shisabulua liasü, iba mapang nungji pa college azüngdang par medemertem den jangratema pelatepa azüngba tu bilemteta aru.

Ni college azüngba mapang tepiyong tu kü taküm nunga kenübo mapa tajung ka ngur inyaka lia tetsür ka agütsü aser jangratema tangar kibongtem menepa liyonga aotsü ta nükjidong tajung ka yur azüngba tu bilemteta aru. Saka tanübo kü tebilemba pungmang tu amajok kümogo ta küsasa angateta aru, anungji tatem nung yamai tang bilema liasü, tanü ni kü tashika mapang nung yamai tang shisabulua lirabangla, kü taküm anünga alibaji jangratemabo melitettsü ta bilema aru. Aji sünung, taoba mapang nung ozü medemer ka shiba tanübo telong nung alir "underground" ka kümer lidar ta angazüker, anungji ni pa tu kar dang asüngdanga bushia odi, aser nia parnok denji alitsü asüngdangdi. Aser parnok ni agizükra, nia parnok amaji tulursa maküma kaa ordinary sepai kabosa masütsü ta ni amanger, aser kü taküm ya yangji jangratema liyonga aotsü ta telemetba ka kü mulung nung rizünga ayu.

Iba sülen tu pa yipden nung tatsüka mangadaka mejanga alitang memeteti ka tanemi tang amüzüka oatok, iba mapang nungji pungmang ka yamai pungmanga liasü, ni tu sepai sübuttsü sübur arem tintet ka nung merangbong tajung machine aketba ka kaloka apur senzüyaa alitang aoksa ka kü jakdang shiruru tuluka ser tetsübuttsüka ajuru, anungji yakta tang ni bena aliba merangbong dakji temelidong tila ka keta aliba tu nemzüka yok, aser iba shiruru dakji kaloktsü nung tia maka injangji teko "chest" nung iatok aser shiruruji asatena arrüa tatsüka peleptena lir kelen yangji tanema laoa tok. Iba sülen tu ni shiruru anasaji or teka agi temang nungji tanemi kongshitangdi ta bilema alitang ni tera tsübuu tok, kechiba ta süra shiruruji ano junga mesü-i ali nungbo aoksa ka saaker kü dak yirutsütsü ta bilema aru, saka ni kü mulung nung yamaji ashi, nia tebour aa tu ya ta ser temulung ulua shiruru dakji tanemi kongshidang nung temang tu lemlemer liasü, saka shiruruji marakzü nungji joko ya süadokogo ta meteta aru. Idangji ni shiruruji kidangi bener tugutsü ta khenbo bilema aru, saka ni iba arem metaji kong arr memeteti liasü iba sülen tu ni tejakleni tatsüka odangtang tanur ola ka angashiji ni ilenjagi tera ilonga odanga ni külenji yim tila ka pongtet, iba mapang nungji ni tu kanga tzüraa aitji ki tila kati tutang nung yangji tanur tebour chanu asem mena angu, anungji ni parnok dangji nenok ya tenüng shibasa ta asüngdanga alitang, kimalen tu kar asatepa ola angashiji ni yakta tang nokdaker kimalen jagi ludang tang aoksa ka mejangba nungi saaka tok. Idangjiang ibai pungmang pungmangerba liasü ta meteta aru, iba sülen tu ni yipden nungjagi saaker tatsüka mena kazüyar kelen nokdaka tzü agi tejak meitok aser pungmang pungmangba tetezü ya kechi asütsü ta bilemdang, saka ni kecha meratet. Iba sülen tu ni tzüraa aitji mi tila ka aputeta süngo ishika mulua jemer kelen yimdongi khen odangdi ta ser kü indang tola "strip" tsükpuraksa ka itaka aliba tu agizüka sümer yidong jagi tatsüka tuguyaa alitang tera lowa ka nungi Aier tepur tajung ka aruyaa anguji nia tanemi tang la tsütsülen jagi tanaba ta aotang la ya taoba mapang nung onok külemi college zünga alila tetsür tu ta reprangteta aru, tetezü "class mate" liasü. Iba tetsürla ya kanga tesüngjem aser lesson kanga nendaka zünga aliba student ka liasü. Ni graduation agiba küm la yaa onok külemi takok angurtem rongnung tu dena liasü. Ni la ya mapang talangka lir kelenang ajuru asünungji tera nüma metangteti ka saalema liasü, kechiba ta süra, iba anogo tashi nungji ni tu kecha mapa menguteti odang lia liasü, aser lai kü tang naa kechi mapasa inyaka alir ta asüngdangtsüsubaji meteta tang liasü. Kodang kena tu teka amtepa o tenzüknar jembitepyonga ao, lai kü dang asüngdanga ashi, medemer naa tanü asüng kechi mapasa inyaka alir ya ta asüngdangji ni la tang odi odia ashi, asenok graduation agir kelen tu ni mapa tila ka tanga ngudisü ta ser Govt. department aika nung kanga meranga interview agütsüdangogo, saka ni amala ka yabo teyarir tajung maliji takok menguteter ta shai liasü, iba jagi tanü tashi yamai tang liyonga odagi ta shia liasü. Idangji lai kü tang ashi, nai ashibaji shidak tang lir, iba kasaji nia interview nung ishibenbo agütsüdangogo saka tanü tashi takok menguteti odang lir ta shia liasü. Iba sülenji lai kü tang ashi, naa kenübosa ozü kidangi kazüyonga arungma ta ashiji, ni pelasete ner kidang jagi aruja ko ta shir kelen kenaji lila. Hopta ka shir lir kelen, ni lar ki tu bushiyonga ao nung kari lar kiji ibai-a ta sayuji ni la tu kima nungjagi aja nung koda shiba ta kikümbang nungji la tu nokdaker repranga alitang, ni la tang ashi, hai medemer junga tang lir südi tu ta ashitang lai ni tu reprangteta asema aruagi kü ket nung ammet aser lar ki telongi aniket aser ashi, naa sünga ozü ki bushia arutetba ya kangasa pelar ago ta shia liasü. Idangji ni kü yangkhu nung la nem tola ka benja aliba tu agiteta agütsü, iba anogo nungji la tetsü-a kidang monga tenji aser lai Asangouba dangji ashi, na amala kati ozü ki bushia arutetbaji niang tepelaba ago ta shia pa den saalema liasü.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Küm 2,800 tejaklen Yirusalem nung menoknok anokba kuli bushitet



Israel Antiquities Authority nungi excavation directors- Joe Uziel aser Ortal Kalaf na den parnoki tutetba osettem angur.

August 06, 2021: Israel nung archaeologist temi akhidang Yirusalem nung menoknok anokba kuli jangjaogo; Laishiba nung Amos aser Zekaria kakat na nung Dawid aser Solomon na yimsüsüba sülen chuba yimli lemsar aliba mapang nung menoknok tulu ka anokba indang shia lir.

Zekaria 14:5 nung Yisu Khrista alimai tanaben arutsü indang shia lir. "Yihuda Chuba Uzzia anogo nung menoknok madang nenok ajenba ama nenok ajentsü, aser KIBUBA kü Tsüngrem aser temeshipur ajak Pa den arutsü."

Amos 1:1 nunga kasa menoknok indang shia lir aser Amos-i küm ana jelia Israel tarutsü indang mangdang anguba shia lir.

Tan hopta Israel Antiquities Authority (IAA)-i, küm 2,800 tejaklen Israel nung menoknok lendong tuluka atalokba indang kuli archaeologist temi ngutetogo, ta metetdakja liasü.

Tamalen-a archaeologist temi Israel tesem balala nung kasa menoknok anokba indang kuli nguteta liasü, ajisüaka tang mezüng Yirusalem nung iba menonok anokba indang kuli angur.

Tawa City of David National Park nung ali tua bushisüngdangba mapang nung akhidang menoknok anokba mapang chirepba ki ka angu, aser iba tesem nungjagi mori chipo, auso, milen aser chipo-aonpo aika nguteta liasü, ta Israel Antiquities Authority-i parnok indang Facebook page ajanga metetdaksü.

Israel Antiquities Authority nung excavation directors- Joe Uziel aser Ortal Kalaf nati, "Akhidang menoknok tesashitaba rongnung iba ya ka asütsü aser teraksatsü tulu agütsüba menoknokji iba menoknok liasü," ta metetdaksü.

Israel Antiquities Authority-i sayaba video ka nung Kalaf-i, "Iba menoknokji kanga tesashi liasü, ibayongji menoknok anokba sülen Yirusalem nung alitsü atema arurtemi teraksatsübatem ma-nung ki asü, aser ibaji ajanga onoki item kuli ngutet," ta metetdaksü.

"Judah nungeri iba menoknok anokbaji kodanga mamadok, ibayongji küm 200 sülen ainkar Zekaria-ia iba menoknok indang jembia," ta Kalaf-isa metetdaksü.

Chhattisgarh nung Khristantem anema inyaksü asoshi rally agi

Washington D.C, August 06 (Agencies): India nung Hindu nationalist lenirtemi Chhattisgarh state kübok Bastar district nung Khristantem anema rally ka ayongzüka agiogo, ta International Christian Concern (ICC)-i metetdaksü.

Iba rally nungji BJP lenirtemi Khristantem anema yazü jembia aser Khristantem anema inyaksü atema ayongzüka liasü. Osang angazükba agi, August 3, 2021 nü Bastar district yimtiba, Jagdalpur nung Khristantem anema rally ji ayongzüka agi. Iba sentong nungji BJP nungi tongti lenir aika dena liasü saka nisung 500 den tajemba aden.

Iba rally nung jembidang Chhattisgarh BJP Tir, Amit Sahu-i, "Asenoki tenla kitem nungi nisungtem atsüzükdi aser yimsü meyipdaksüba anendaksüdi," ta ashi.

Sahu-isa, asenoki Bastar District ya yimsü meyipdaksüba khenyongi maliba tesem ka kümdaksüdi, ta ayongzüka.

BJP lenir, Roop Singh Mandavi-i, "Region nung yimsü

meyipdaksüba nung shilem agir Khristantem asenoki tsübudaksütsü. Asenoki Bastar nung missionary mapa khenyongi memelatsü aser yimsü meyipdaksüba nokdangba ajanga Hindu yimsü kümzüksü," ta ashi.

Iba rally ayongzüka agiba ajanga Chhattisgarh nung Khristantem atema reshikangshi tensa ano tamajungba akümtsü, ta bilemer.

Taoba ita nunga Chhattisgarh kübok Sukma District nung Khristantem anema inyakba tatalokba aika liasü. Superintendent of Police-i district police dang Khristantem dak tenük yokang aser ozüng alema yimsü meyipdaksüba nokdangang, ta tuyuba sülen state nung Khristantem anema inyakba tatalokba aika liasü.

State nung Khristan lenir kati, "Iba rally nungji nisung ishika dang adenba ajanga onok melung anisüngzüker, kechiyong iba sentong nungji nisung 10,000 nungi 12,000 shi adentsü ta onoki bilema liasü,

saka nisung 500 den tajemba aden," ta metetdaksü.

"Iba rally ji kanga takok ngua magi, ajisüaka Hindutva lenirtemi ano tesashiba inyaksü," ta Jagdalpur nung pastor kati ICC nem metetdaksü.

"Parnoki talisa yimtsüngtem nung Hindu yimsü dangi tanaben meyipdaksütsü sentong yanglua lir. Tsüngremi dang Par nüburtem kümzüktettsü," ta pastor-i ashi.

"State nung pastor aser Khristantem anema inyaker aser tang rally ayongzüka agiba ajanga no tamajungba kümtsü. Onoki sarasadem nungdaker aser onok pusemertem nungdaker," ta pastor-isa metetdaksü.

India nung anti-conversion ozüngtem nung ajemdaker Khristantem anema inyakba kanga bulua akümer. Tang India nung Odisha, Madhya Pradesh, Arunachal Pradesh, Uttar Pradesh, Gujarat, Jharkhand, Himachal Pradesh aser Uttarakhand state tem nunga anti-conversion ozüngtem lir.

ANOGO ABEN TSÜNGREM DEN

Tabensa Liang

"Anungji nenok kotaker Tebu koda tabensa lir, yamaji nenoka tabensa liang." Mathi 5:48

Greek oshi nung 'telios' ta asüba tetezüji mapa tembanga inyatetba, shisatsü nung tain akümba, takok nung temtetba. Aser iba oji asen Ao Laishiba nung tabensa ta meyipzüksür. Aiben iba lai tekong ya, khrista dak temenen maliji asenok daka takta temenen malitsüla ta sa rateta jembir. Saka asenok meimchir asoshi aji tamakoktsü lir.

Yisu shinübajibo, asenoki tekong 43 nungi züngra tajungba angatettsü. Tebu Tsüngremi koda tebendang makai alima ajunga meim, aser iba atemaji Techiri pei taküm bendanga agütsü, yamaji asenokia pei kiyonger meimtsü, tsükchir meimtsü jembia lir. "kechi koda nenok tebu yimlibilem lir, yamaji nenoka yimlibilem liang" (Luk 6:36)

Aseni pei meimnüba nisung dang meimba aser yimlibilem sayubaji masü saka tamajunger tsüngdanga kasa taochi amshiba ajangaji asen mapaji tabensa kümdaksür. Aser yamala inyakba ajangaji asenok pa ama abensaa inyakbapur akümer. Iba amai kibuba tsüngsü nung anitakba jagi asenok tabensa kümdaksür.

SARASADEM:

Tulusang Tsüngrem, na ama tabensa akümtsü ni merangdi, Nai ni yariangma. Amen.

Sri Lanka nung tanurtem mapa meinyakdaksütsü Arogoi mepishi

August 06, 2021: Sri Lanka nung Arogoi Sri Lanka sorkar ajemdaker parnok nem tai dang tetsür tanur ka asüba ken

o tekaraba nung bushisüngdangtsüla, aser linük nung, talisa tea estates nung tanur nem mapa tasak inyakdaksüba anentsü atema ozüng yanglushitsü mepishi.

Kandy nung tongti putir, Vianney Fernando-i sorkar dang arrshi küm 16, Ishani tepsetba tekaraba nung bushisüngdangtsü atema mepishi; la ya taoba mapang cabinet minister Rishad Bathiudeen'er kidang mapa teinyakdak liasü.

Iba ya ajanga linük nung tanur aser tetsürtem tem alar tia nung ayuba kuli sayur, ta putiri ashi.

Tetsürlaji mi agi mejungi ronger July 3 nü Colombo National Hospital-i anir oa liasü, iba sülen anogo 12 dang lirbo la asü. Post mortem ajanga la dak aiben tashiyim mapa inyakba kuli ngua liasü.

Fernando-i sorkar dang ken o junga akaba den bushisüngdangba sülen aibelener ajak nem temerenshi agütsütsüla, ta takhangba agütsü.

Tetsürla tepsetba ken o dak sendakba nung police-i taoba mapang minister kinüngtsü, adianu aser kinüngtsü tebu densema nisung aika puogo. Nisung shibelenba aser tanur

nem mapa inyakdaksüba nung tonglokja lir.

"Tanur shinga tangar kidang mapa meinyakdaksütsü atema ozüng yanglushitsüla," ta August 6 nü putiri sangdong ka ajanga metetdaksü.

Süngolu nung inyaker tanurtem nem shisaliok agütsütsü atema sorkari inyaksüla, ta pai sorkar dang mepishi. Tangar kidang mapa inyakertem temeden balala kümzüka ayutsüla, ta linük Tir, Gatabaya Rajapaksadangi züluba shidi nungji shia lir.

"Süngolu nung inyakertem, talisa tanurtem ajak taküm akhüm keta litettsü, senso ajak kasa züngshitsü aser temeden ajak agütsütsü atema sorkari inyaksüla," ta shidi nungji shia lir.

Alima nung bendang linüktem dang süngo timba ayokba linüktem rongnung Sri Lanka ya jenjang pezübuba nung lir, ajisüaka linük nung süngolu nung inyakertemji kanga sensakertem lir aser loktiliba nunga parnok kanga sendoker.

Meimchir temeden atema inyaker, Sudesh Ranasinghe-i, Arogoi commission ka tenteta süngo lu nung inyakertem tebilemstü onük balala repring nungbo kanga ajungtsü, ta shiogo.


OLONG PAITEP # 5898

1						2				3
								4		
5		6				7				
8										9
								10		
				11		12				
		13								
14						15				
			16							

TIPILEN		LANGTSÜNGLEN	
1. O jembitsü tashi	- 8	1. Tepok telung nung shilem ka	- 7
5. Súngjang tapu ka	- 5	2. Tamajung aküm	- 5
7. Tekanük nung enokba	- 5	3. Chi den külemi achiba	- 3
8. Teka amtep	- 5	4. Meimchir alimai aruba	- 3
12. Tzüc asendak	- 5	6. Laishiba nung ayong ka	- 4
14. Tsüngpang tema aliba	- 5	9. Tarutsü nükla	- 7
15. Ken atenba yimya	- 5	10. Tamendakdak/Nükjidong	- 4
16. Asangur	- 8	11. Tenük-telen mejungi aküm	- 5
		13. Terok nungi adokba	- 3
		14. Meimchir telemsa	- 3

OLONG PAITEP # 5897 TELANGZÜBA

TIPILEN :		LANGTSÜNGLEN :	
1. Taa, 3. Teküm, 6. Aibelen, 7. Aut,		1. Tai, 2. Asensor, 3. Tanü, 4. Kua,	
9. Ajizük, 10. Ojala, 11. Semer,		5. Mitsüksü, 6. Azübenshi, 8. Lah,	
13. Sen, 15. Kioktsü, 17. Itsük, 18. Kar.		9. Jangkok, 12. Akok, 14. Nashi, 16. Sür.	



TANÜBO NAI LANGZÜANG

Q. Panna Tiger Reserve ya koba State nung lir?

A. West Bengal B. Bihar

C. Madhya Pradesh D. Andhra Pradesh

_____ (Taruba adok nung onoki langzüksü)

YASHI ADOK TELANGZÜBA : 2013

AO OSHI ANGAZÜKDAK:

TANÜ ANGAZÜKTSÜBA OJANG

Kitem
(n) ki tip anatsülen atem amai talila tilaka yangluba (verandah)
* Kidak kitem keta yangluba agi topur jungdaksür.

Kiti
(n) ki tulu, kilang ki (big house)
* Kiti nung asoba agi Kitimen aja.

NAI-A YA METETTER MA?

INDIA NUNG NÜBURTEMI SAPUA

ALIBA GARI KAR: 'JULY 2021'

1. Maruti Wagonr	22,836
2. Maruti Swift	18,434
3. Maruti Baleno	14,729
4. Maruti Ertiga	13,434
5. Hyundai Creta	13,000
6. Maruti Alto	12,867
7. Maruti Vitara Brezza	12,676
8. Marut Dzire	10,470
9. Tata Nexon	10,287
10. Maruti Eeco	10,057
11. Hyundai Grand i10	9,379
12. Hyundai Venue	8,815
13. Kia Sonet	7,675
14. Kia Seltos	6,983
15. Tata Altroz	6,980

SUDOKU # 5938						TELANGZÜBA # 5937												
		8			9	2	2	5	6	3	8	4	1	9	7			
		9	1	3		4	6	1	9	7	2	6	5	4	3	8		
2	4		6	8		1		8	4	3	1	9	7	5	2	6		
5	3		8				9	6	1	9	8	2	3	7	5	4		
9		2	5		3	6	1	5	7	8	9	4	1	3	6	2		
		1	4	2			3	5	7	4	3	2	5	7	6	9	8	1
			5	9	2			6		7	2	4	6	3	9	8	1	5
								9	4	9	6	5	7	1	8	2	4	3
4			1	7				8	3	3	8	1	4	5	2	6	7	9

OJANG LUTEP # 5483

ÜNGSERTM :

INANDG :

BHIUSR :

DNGA :

UNNIG :

TSRNGEMÜ :

RBHIIUS :

MTAA :

KAKOT :

AGUTNSÜ :

OJANG LUTEP TELANGZÜBA # 5482

TETENLARI MULUNGOA AGÜTSÜ YONGJIA TAMSHIR
TEKA MENENA LIRA AJAK AMAJOK

TAN HOPTA ATEMA - KOMA SÜLA ?

Q. Mizoram aser Assam arrtsülen atalokba ama Nagaland aser Assam Police na ta arrtsü raktepa khatempa nunga koma süla?

Olong 20 shi nung August 09, 2021 tashi nung iba telangzüba ya onok dangi (e-mail - tiryimiyim@gmail.com) :
(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzübatemji taruba Honibarnü adoktsüsü.



August 06, 2021 nü New Delhi nung Union Health Minister, Mansukh Mandaviya aser Serum Institute of India (SII) CEO, Adar Poonawalla na senden amendang tangokba noksa nung angur.

Opposition-i Jantar Mantar nung aluyimertem pusema longkak ait

New Delhi, August 06

(Agencies): Aluyimertem pusema Hokolbarnü Congress lenir, Rahul Gandhi densema opposition lenir aika Jantar Mantar-i oa aluyimertem den külemi longkak aita aluyimba ozüng asem agientsü atema takhangba agütsü.

Opposition lenirtemi 'Aluyimertem Kümzü kang, India Kümzü kang' ta ozülu amer yimyim ayima Jantar Mantar tashi aoba sülen aluyimertem den külemi longkak ait.

Congress lenirtem-lemtepnar, saka parnoki (Centre) memelar. Narendra Modi-i India nunger phone ajak itdangitogo," ta Rahul-i ashi. Honibar anepdang Parliament House nung opposition lenir 14 senden amenba mapang nung Jantar Mantar-i oa aluyimertem pusemsü atema lemteta liasü.

Jantar Mantar nungsa Rahul Gandhi-i Pegasus ken o-a süoka liasü.

"Aluyimba ozüngtem anema nokdakba pusemsü atema tanü opposition party tem ajak yangi (Jantar Mantar) adenshiogo. Onoki Pegasus ken o nunga o

lemtepnar, saka parnoki (Centre) memelar. Narendra Modi-i India nunger phone ajak itdangitogo," ta Rahul-i ashi.

Honibar anepdang Parliament House nung opposition lenir 14 senden amenba mapang nung Jantar Mantar-i oa aluyimertem pusemsü atema lemteta liasü.

Opposition party tem senden nungji Congress, DMK, TMC, NCP, Shiv Sena, RJD, Samajwadi Party, CPIM, AAP, CPI, IUML, RSP, NC aser LJD nungji lenirtem aden.

2020 küm gari lendong lakh 3.66 liasü aser nisung lakh 1.32 asü

New Delhi, August 05

(Agencies): 2020 küm India atalok aser item lendong nung nisung 1,31,714 süogo, ta Parliament nung sorkari metetdaksü.

Lok Sabha nung Minister of Road Transport & Highways, Nitin Gadkari-i, shisaliok, engineering aser emergency care nung ajemdaker par ministry-i gari lendong ajema kümdaktsüsi atema asalentong yanglua inyak, ta metetdaksü.

Ministry of Road Transport and Highways (MoRTH)-i linük nung district shia nung Member of Parliament's Road Safety Committee dang gari amshirtem nem

awareness agütsüsi atema metetdakja liasü, ta minister-i ashi.

Ano tanga tasüngdangba ka langzüdang Gadkari-i, tan financial year mezüngbuba ita asem nung linük nung national highway kilometer 2,284 yangluogo, ta metetdaksü.

Minister-isa, 2021-22 kümsük atema linük nung national highways kilometer 12,000 yanglutsü atemzuka lir, ta metetdaksü.

Ano tanga tasüngdangba ka langzüdang Gadkari-i, gari lenmang anasa terenlok mapa balala inyaksü, sign inoktsü aser tesem tepor junga yanglutsü atema Tourism

Ministry-i tourist destinations 100 agütsü, iba nungjagi 50 shimogo, ta metetdaksü.

Patrolling Point 17A nungi India aser China sepaitem ainshiogo

New Delhi, August 06

(Agencies): Hokolbarnü India aser China napronglai patrolling point 17A, Gogra nungi sepaitem ainshidaktsüogo; anüdoklen Ladakh kübok Gogra nung yaküm May ita nungi linük sepaitem tsüngda rara adoktsüsa tensa liasü.

Indian Army-i sangdong ka ajanga, "Linük anaprong nungi sepaitem tangbo pei pei permanent bases nung lir," ta metetdaksü.

Linük ana sepaitem senden 12ben buba amenba mapang nung linük anapronglai Gogra, ta ajaba PP-17A nungi sepaitem ainshitsü bangjema

liasü.

Indian Army sangdong ajangasa, "Anogo ana tsüngda linük anapronglai shilem lemsar sepaitem ainshi. "Linük anapronglai iba area nung LAC junga mittsü aser akhümtsübuttsü; linük ka kijai telemtetba agia meinyaktsü bangjema liasü. Iba ya ajanga mangatettep ken o kabo benteter," ta metetdaksü.

Taküm June 25 nü India aser China nati video conferencing ajanga 22buba Working Mechanism for Consultation & Coordination on India-China Border Affairs (WMCC) senden mena liasü.

GOVERNMENT OF NAGALAND DIRECTORATE OF SCHOOL EDUCATION KOHIMA NAGALAND.

NO.ED/SCH/PMS-3/2019-20

Dated, Kohima, the 5th Aug' 2021.

NOTIFICATION ON PRE-MATRIC SCHOLARSHIP FOR MINORITY STUDENT UNDER MINISTRY OF MINORITY AFFAIRS.

This is to inform that the Ministry of Minority Affairs will be opening the National Scholarship Portal (NSP) shortly for the year 2021-22 and the DBT Mission, Cabinet Secretariat has directed to implement the following measures to further secure the portal.

i. **Authentication of L1 & L2 officers:** Aadhaar based demographic authentication of Institute/District Nodal Officers (INOs/DNOs) has been made mandatory prior to the verification of the applications by them for which the INOs/DNOs have to provide their Aadhaar number on the NSP Portal.

The facility of the Aadhaar based authentication of L1 and L2 level officers has been made live on the NSP Portal and the OTP generated during the process will be sent to the mobile number registered with the Aadhaar of INO/DNO/SNO. NSP will be using the same mobile number for all communications and sending OTPs in the future. The procedure for the KYC for new Institute Nodal Officer is given in the Portal under SERVICES section. The NSP login of the INO would be operational post completion of KYC at the NSP using Aadhaar number of the INO.

ii. Those Institutions who are not yet registered in NSP Portal are requested to register through their respective DNOs so that students can apply scholarship on time.

(SHANAVAS C) IAS
Principal Director

Issued by DIPR

GOVERNMENT OF NAGALAND DIRECTORATE OF SCHOOL EDUCATION KOHIMA NAGALAND.

NO.ED/PMS/ST-3/2019-20

Dated Kohima, the, 5th Aug' 2021

NOTIFICATION ON PRE-MATRIC SCHOLARSHIP SCHEME FOR SCHEDULED TRIBE STUDENTS STUDYING IN CLASS IX AND X UNDER DIRECTORATE OF SCHOOL EDUCATION.

It is hereby notified to all the students and institutions that:-

1. The Common Scholarship Portal for Pre-Matric Scholarship Scheme for Scheduled Tribe students studying in class IX and X will go live (active) by 9th Aug'2021 till 30th Oct'2021 via Common Scholarship Portal, of the Government of Nagaland, under URL <https://scholarship.nagaland.gov.in>.
2. The last date for institutions for submission of Annexure-I (hard & soft) (can be downloaded in the department website <https://education.nagaland.gov.in>) to the DEO/SDEO office is 15th Nov'2021.
3. The last date for DEO/SDEO office for submission of Annexure-I (hard & soft) to the directorate is 30th Nov'2021.
4. Students and Institutions are instructed to go through the guidelines in the given portal for necessary instruction.

(SHANAVAS C) IAS
Principal Director

Issued by DIPR



Prayagraj (Uttar Pradesh), August 06, 2021: Prayagraj nung aliba Ganga ayong nung kanga tzü tali metsünga ayimba ajanga Bade Hanuman Ji tekülem ki akasa tzü metsünga aliba noksa nung angur.

TEPELA LEMSATEPER

Ungma Yimlang Yimsongunger Kidong züngsem jabaso Mr. Aotushi Imsong, S/o Mr & Mrs. Taliwapang Imsong, shibai 2021 NBSE kübok HSLC tatidang nung takok tulu ngutetogo, (Top 12), ya asoshi Tsüngrem tenüng asanger aser takoker nem konang tetushi agütsür. Anünga aliba shisaluyim wadang aser akümlir wadang ajak nung takok tajung maojang ta Tsüngrem dang sarasademsür.

Sd/-
Yimsongunger Kidong
Ungma Yimlang



August 06, 2021 nü Tehran nung India External Affairs Minister, Dr. S. Jaishankar-i Iran Tir tasenba, Ebrahim Raisi ajurudang tangokba noksa nung angur.

UK nung Nawaz Sharif indang Visa atsülangtsü memelar

London, Luroi/August 06 (Agencies): Taoba mapang Pakistan ato kilonser inyaka alisang Nawaz Sharif-i visa atsülangtsü atema application züluba UK Home Office ajanga magizük, ta osangtem ajanga Hokulbarnü ashi. Arishi küm 71 tain Sharif ya Pakistan nung ochimashi ken o ana nung aija lir, aser Lahore High Court ajanga pa bendang lima nung oa hopta pezü temang anepalutsü atema November

Taoba S Africa tir Zuma mozü kidangi anir ao

Cape Town, Luroi/August 06 (Agencies): South Africa indang taoba Tir Jacob Zuma, shiba court-i ashi mangaba yong taoba ita tepuokdaki yok, pa temang anepalutsü atema tepuokdak anasa aliba mozüki kati anir ogo, ta ketdangsürtemi ashi. "Pua alir ajak aser tepuokdaki yoker ajak nem temang anepalutsü densema temeden agüja lir," ta Department of Correctional Services ajanga Hokulbarnü sangdong ka nung ashi. Teti ama temang reprangtsü asoshi anir ao, ta ashiba dak alaka pa Hokulbarnü mozü kidangi anir aoba atema kuli danga kecha magütsü. Taoba tir ka ama Zima temang anepaluba nung South African Military Health Service adentsü nüngdak, ta department

GOVERNMENT OF NAGALAND
DIRECTORATE OF ART AND CULTURE
NAGALAND: KOHIMA

NO.AC/PC-3/2019-20 Dated Kohima, the 6th August, 2021

ADVERTISEMENT

Azadi Ka Amrit Mahotsav is being celebrated across the nation to commemorate India's 75 years of Independence. Several events are being organized to enlist the participation of the people to commemorate the event. One such initiative, connected with the National Anthem, has been taken up by the Ministry of Culture, Govt. of India for celebrating Independence Day this year to instill pride and unity among Indians all around. In this, the people have been invited to sing the National Anthem and upload the video on website www.rashtragaan.in. The compilation of National Anthem will be shown live on **15th August, 2021**.

All are requested to participate in the event and celebrate India's 75 years of Independence Day by singing the National Anthem and record and up-load his/her videos on the <https://rashtragaan.in> portal.

The persons up-loading the video will be issued a certificate. The person can download the certificate and he/she is requested to WhatsApp it to +91 8974549398.

Sd/- ADELA MOA
Director
Art and Culture
Nagaland, Kohima

Issued by DIPR

Philippines yimtiba nung lockdown tasen benoker

Manila, Luroi/August 06 (Agencies): COVID-19 mozü agütsüba tesem kar nung nüburtem mozü agütsü nungtepa aoba sülen Delta variant prokshia aoba azüoktsü mechi Philippines yimtiba aser anasa aliba province nung tenokdangba tesashiba benokogo.

Nüburtem senzüsempogba nung tenokdangba ya ayatirm sülen Hokulbarnü Metro Manila ajunga nung benok, kong yimti 16 lir aser yangji nisung million 13 alir.

Anasa aliba Laguna province, kong nisung million 3.3 alir, yangjia kasa talenba ya benok, aser ano central aser southern Philippines tsütsü Iloilo aser Cagayan de Oro yimtittem dena lir, ta tir indang odongtar Harry Roque-i ashi.

Metro Manila anasa aliba Cavite aser Rizal province, kong nisung meyokteper million 7.6 shi lir, yangjia tenokdangba kar agütsü. Saka iba province ana nung alir ya aika linük yimtiba nung mapa inyaker aser Metro Manila nung tenokdangba agütsüba yagi kongshitsü akok.

Lockdown benoktsü lia sorkari COVID-19 den raraba aitsüba anema Roque-i ain adoka jembi. Metro Manila aser anasa aliba province tem nung vaccination centre tem sünga nisung meyrirjang aika adenshia rongrong adok aser nisung kar tera agi majemset.

"NISung kari osang tiazü prokshitsü meranger amai bilemer. Parnokji pei takum nung mapang tajung inyaktüsü mali. Tang tashi parnok dak COVID memenaba asoshi ni mangateter," ta pai Tagalog nungi ashi.

Mozü magi alir nem sorkari teyari magütsütsü ta osang prokshi tenzükba sülen nüburtem mozü agütsüba tesemi asemtepa liasü. Saka iba osang ya tiazü lir, ta sorkar indang odongtari jangjashitsü aser iba amala osang prokshir anema ken o benoktsü ta ashi. Saka taoba hopta Tir Rodrigo Duterte-i television ajanga nüburtem den jembiba mapang, mozü magi alirtem ki alema meyoktsü, ta shia liasü. Ajidang masü mozü magi alirtem tepuokdak ayutsü amokmeren.

Afghanistan nung media ketdangsür ka tepset

Kabul, Luroi/August 06 (Agencies): Taliban teloki Kabul yimti nung Government Media and Information Centre director tepset.

Tolo news ajanga ashiba agi Dawa Khan Menapal ya prangbong bena alirtemi linük yimtiba nung aliba Darul Aman Road nung tepset.

Pai mapang shia Afghan sorkar indang jenjang Twitter nung sangdonga liasü aser yangji pa indang follower 142,000 dak tema liasü.

Mapang ka Menapal ya Afghan Tir Ashraf Ghani indang odongtar inyaka liasü.

Taliban teloki Kabul nung defence minister indang ki maker anogo ishika lir iba lendong ya ajurur alitsü.

Bodhbarnü lendong atalokba sülen Taliban-i sorkar ketdangsür dak maneni tenük yoker amaktsü ta ashi. Ibai Kabul yimti nung küm ka jungnüa nung telungpur temi bomb pokloktsüba lendong tulu mezüngbuba liasü.

"Tia maka taochi maliba kiralongrar temi maneni tasü mait mapa inyaka Afghan linük meimer ka tepsetogo," ta interior ministry indang odongtar Mirwais Stanikzai-i ashi.

Afghanistan tensa indang jembitsü atema UN Security Council ajanga Hokulbarnü senden ya ayongzüka liasü.

Taliban teloki linük tesem tuluka atsüngsepogo aser tang parnoki linük south nung Kandahar, rongsenketzüng tsütsü tongtipang Herat, Helmand Province indang yimtiba, Lashkar Gar densema tongtipang yimtittem amaker.

US aser linük balala nungi sepaitemi Afghanistan nung

küm 20 rara arur parnok iba linük nungi ainshitsü sangdongba sülen item ya ataloker alitsü.

Tensa tamajungba akumba ajanga Afghan sorkar ketdangsürtemi senden ayongzüksü mepishi, ta diplomats ajanga ashi. Senden ya New York nung anepdang 10:00 ako (par mapang) nungi tenzüksü lir.

Brehostibar aonung US aser Afghan sepaitemi tayimtsü amshia Lashkar Gah nung Taliban telok alidak maka liasü.

Sorkar meyong sepaitemi tongtipang jila tem Taliban nem merakzükdaktsütsü nangzüka lir, aser yangji kanga sashia rarar. Ketdangsürtemi civilian tem dang item tesemji yutsür ainshitsü ajungshio, kong nisung meyrirjang aika taolen lenmang mali shibanga lir aser aika jenogo.

Kidanger linüktemia Afghanistan tensa indang ya Hokulbarnü jembitsü lir.

Afghan teblemstü indang jembishinütsü atema Kazakhstan, Kyrgyzstan, Tajikistan aser Uzbekistan linüktemi parnok diplomats tem Caspian Sea nung Turkmenistan indang Avaza jilai yokogo.

Taiba ita Afghan arütsü ajangba tesem tongtipangtem densema Taliban teloki tesem jenti amokbanga region nung tensa tamajungba akumba mapang Russia-i tan hopta Uzbek sepaitem den lungjemer military drills agia liasü.

Brehostibarnü European Union-ia Afghanistan nung arrsanga teti atema ceasefire lidaktsütsü asoshi inyaktüsü ajungshia liasü.

District balala nung I-Day atema senden amen

Wokha, Luroi/August 06, 2021 (TYO): Aruya aliba Independence Day benjungmung dak sendakba nung, Brehostibarnü (05.06.2021) Deputy Commissioner Conference Hall, Wokha nung Heads of Departments (HoDs) tem telongjem senden ka ayonga agiogo. Deputy Commissioner, Wokha, Orenthung Lotha-i anir iba senden agia liasü, ta sangdong ka ajanga metetdaksü.

Iba anogomung (Independence Day) sentong takok ngua agitsü atema, district kübok department balalai mapa lemer inyaksü asoshi onük balala benoka telok olemtepa liasü.

Mapalem indang copy ka ka HODs shia nem yakta agitsü, ta DC-i ketdangsür ajak dang metetdaksü aser iba anogomung sentong takok ngua agitettsü asoshi pei pei nem lemzüksüba maparen nendaka inyaksü asoshi pai ketdangsür ajak dang mepishi.

DC-i, iba sentong magidang Department balala ajanga teküboklen agüja aliba maparen achaayanga inyaksü asoshi züngsem dang metetdaksü.

August 14, 2021 nü Superintendent of Police, Wokha-i National Flag Rally ayongzüksü, Project Director, DRDA-i achaayanga Self Help Groups (SHGs) temi sales day ayongzüksü. August 10

asert 11, 2021 nü General Manager Industries & Commerce-i alu nungi züsenteba tem tongtibangsa citronella totzü tem ayoktsü asoshi sales day ayongzüksü.

August 10, 2021 nü, kaketshirtem atema Department of School Education-i painting aser otsüno tetoktepa ayonga agitsü. August 12, 2021 nü Youth Resources & Sports and District Transport Office-i Flag Rally and Road Safety awareness campaign ayongzüksü. Kasa anogo Forest Department-i New DCs office complex nung süngdong atemba sentong ayongzüksü.

August 10, 2021 nü SHGs aser lenmang nung shishilembar (street vendor) tem den AUDO longjemer PMSVANIDHI Camp ayongzüksü. August 13, 2021 nü District Administration den DLCW-MSK Sakhi-OSC longjemer Police Point area nung COVID-19 sensitization aser Beti Bachao Beti Padhao (BBBP) kübok tetsürtem atema awareness programme achaayanga agitsü.

August 13, 2021 nü district kübok colony/ward aser Sorkar office ajak nung nübudok mapa ayongzüksü asoshi telok bangjemtepogo; aser iba nübudok mapa nung nübur aser sorkar tenzüka wadang nung inyaker ajaki shilem agitsü asoshi DC-i mepishiogo.

Maneni, kasa senden nung,

SDO (C), Wokha, Chonpenthung Ezung-i, August 07, 2021 (Honibar) nungi tenzüka Wokha jila kübok colony ajak nung District Task Force-i COVID-19 vaccination drive aser random testing agitsü ta metetdaksü aser nübur ajaki iba maongka agitsü asoshi pai ayongzükogo.

ABOI:

Hokolbarnü (06.07.2021), ADC Conference Hall, Aboi nung Additional Deputy Commissioner, Chumlamo Humtsoe, NCS-i ADC Office, Aboi kübok HODs ajak den senden ka agiogo. 75buba Independence Day

anogomung dak sendakba nung sentong reneimsü asoshi iba senden agia liasü.

Iba sentong takok ngua agitsü asoshi Aboi kübok department balala nem mapa lemzüksüogo. Humtsoe-isa, Independence Day benjungmung sentong nung staff ajak medema aruagi adentsü asoshi metetdaksüta ta HODs dang tuyuogo.

Independence Day anogo matongdang, August 13, 2021 nü Aboi nung cleanliness drive ayongzükaga agitsü, ta Humtsoe-isa metetdaksü.

KIPHIRE:

Brehostibarnü, DC Conference hall, Kiphire nung Kiphire District Planning & Development Committee senden ka agiogo.

(Maneni tapak 10 nung...)

Menungra Bilemteter



Asür MENDANGSANGLA
Tasüba Anogo : 07.08.2020

Temeim Oja, na iba akümi wadang renemer teti anisüngzükdaki orr küm ka jungaka nü temeim mapa, ajemalu, taremzüc aser menürem jakden onoki kodanga amatsü makoker. Tanüa na onok den ali medem na menungraseta amonger. Kenü anogo Kotaker Tepu den anisüngzükdak na ajurutsü onok teyimla aser sarasadem.

Temeim Chirnur, Semchirtem aser Kinüngertem.



OFFICE OF THE
MOLUNGYIMSEN STUDENTS' UNION

P.O. Tuli 798618

Dist: Mokochung, Nagaland

Tenüngsang Agütsür


Molungyimsen Kaketshir Telongjem (MSU)-i teküpoklen agüja aliba lennir aser kaketshirtemi pei pei wadang nung menden temaba aser takok tajung anguba atema tenüngsang tetushi agütsür.

1. **Wb. Temsütoshi**, SDAO nung Deputy Director promotion anguba.
2. **Sp. Yimjungjungshi Sanglir**, S/o I. Anungba Sanglir. Percentage scored in AISSCE 2021 examination : 94.4% (Arts Stream).
3. **Kr. Sentimenla B. Ao**, D/o late Bendangnukshi. St. Mary's School Dimapur, HSLC, NBSE (2020-21) subject topper Enviromental education with 4 sub distinction (A1). MSU-i parnok ajak asoshi maneni temoatsü meshitsür aser Tajungsang Tsüngremi parnok takütem len aniang ta sarasademtsür.

Sd/-
Imnatoshi
President, MSU

Sd/-
Likala
Gen. Secy. MSU

KIJA ATEMA, AJAK ATEMA COVID JEM AGIDI TA SHIANG



#LargestVaccineDrive

NÜ TAKÜM AGI TETENDANG - VACCINE AGIANG !!

- Covid jem agiba ajanga na shirangtsü aliba nungi kümzüksü
- Covid jem agiba agi külem lisemertem temang tashi itta kümdaktsütsü
- Covid-19 ajem nung lendong mali, ibai mozü yanglurtemi kanga junga tendangogo
- Covid-19 ajem agir shirangdaktsüba ya tera dang aser khen nung jungadoktsü.
- Tanur mamayonger alir tetsütema Covid-19 ajem agitsü akok.
- Tanur bena alirtem Covid-19 jem agir lia tashidak menayonga, lendongi aitsüsa shirangtsüba lenmang kanga mesüa lir.
- Tanur bena aliba mapang Covid-19 agi wara agi tongra, tanur soli ajem agitettsü.
- Aikati ajem agiba agi akhi ama tensa mapang shitak küma arutsü
- Ajem agiang. Ajem agiba agi taküm aika kümzüksü.

State Health Helpline 1800-345-0019; National Toll Free:1075

For COVID vaccine related enquiry, kindly call State Health Helpline and Press '3'.

NBCC-i Clean Election Movement... (Tapak 1 nungi...)

"Centre sorkar dak dang metaloka melii asen state-i asenok peritsüsa ketdangsütetba lennirtem shimtsü mapang tongogo. Iba alizüngji tongtetsü atema asenoki election maparen aser election merüka ayutsüla" ta Dr. Villo-isa ayongzük.

Iba sentong nung Naga Students' Federation (NSF) social & cultural secretary Benjongakum Longchar aser All Nagaland College Students Union general secretary Imnameren Jamir natia NBCC-i mapa inyakba pelashishia agizük aser pusema nungittsü ashi.

Western Angami A/C nungi taoba independent Candidate Huzo Meru-ia 2013 election nung clean election candidate ka ama toktepa osang lemsatap.

"Nagaland nung Khristantemi election mapang pei tamang tenla kidang yutsür aser candidate tem sen aika endokdaksür" ta Huzo Meru-ia ashi.

"Arogo balala nungi pastor temi osang sangdongtsüla aser proxy voting azüoktsü atema polling station semdangtsüla, kechiyong Naga loktiliba nung Arogoi dang temelenshi bener arutetsü" ta paisa ayongzük.

CLEAN ELECTION MAPAREN INDANG TAMENDAKDAKJI

ELECTORAL ROLL SHITAK AYUTSÜBA LIR: TUENSANG DC

Hokolbarnü Tuensang nunga Clean Election Movement tenzükogo. Iba sentong ya CBLT Conference Hall, Tuensang nung Chang Baptist Lashong Thangyen (CBLT)-i ayongzükaga.

"Clean election maparen indang tamendakdakji electoral roll shitak ayutsüba lir. Asenoki votes tim mesüi amshir ibaji asen temetentem aser maitsü sen yong yokdokba ama lir" ta tanü sentong nung Tuensang Deputy Commissioner & District Election Officer, Kumar Ramnikant-i ashi.

"India nung democratic inyakyim nung nübertemi lennirtem shimteter. Anungji proxy mesüra bogus voters malitsüla aser e-roll shitak dang ayutsüla" ta paisa ashi.

"Asenoki electoral roll shitak ayutsü atema yariteptsü ayongzük. Lennirtemi temelenshi aser terenlok bener maruba atema public-i ola adokba anentsüla aser iba ama lennirtem shimba atema tebilemtsü khuret abentsüla" ta DC Ramnikant-isa metetdaksü.

Paisa nübertem dang clean election osang ajanga nisung ajak atongtsü ayongzük.

"Nagaland nung taila

electoral rolls yangluba yimya ka lir anungji nübertemi ketdangsürtem den yaritepa e-roll merüktetsüla. Yamaji inyak nung dang asenoki lennir tajungtem shimtetsü" ta Chang Khulei Setshang president, Nungsang Lemba-ia ashi.

"Clean election campaign ya shisatsü agi inyakba maparen ka lir aser iba ya nübertem longjemer inyaksüla" ta Tuensang District Assistant Election Officer, Renben Mozui-ia ashi.

"Ketdangsürtemi e-roll nung chichiba voters jangjatsü, absentee voters agentsü aser tenüng kasa enoka aliba den nisung ka dang sernung inter district aser inter constituency nung enoka alirtem puteta agienba maparen nung nisungtemi yariteptsü mepishir" ta paisa metetdaksü.

Paisa PwDs dang e-roll nung zülüoktsü atema mepishia liasü.

CBLT Executive Secretary, Rev Achu-ia okila jembidang "tanü asenoki ajuruba khurettem ya asenok sasa inyaksaba lir anungji asenok ajak temelenshi bener arurtem asütsü ayongzük" ta ashi.

Iba sentong nung TTBP President, GB aser pastor tem aser Baptist Thangyen Higher Secondary School, Tuensang kaketshirtem aden.

District balala nung I-Day... (Tapak 9 nungi...)

Iba senden nung Deputy Commissioner, T. Wati Aier, NCS-i Independence Day sentong atema teküboklen agüja aliba maparen achaayanga inyaksü asoshi metetdaksü:-

1. National Anthem - V.G Band Kisetong
2. March Pass- 14 IRB aser 41 Assam Rifle Kiphire.
3. Supply Department ajanga Rostrum nung benjung sübütsü yoktsü.
4. Horticulture Department ajanga süngo jemtsü anepalutsü.
5. PWD (R & B) ajanga Public Ground nung maparen achaayangtsü.
6. Seating Arrangements- DEO aser District Administration
7. EE PHED ajanga lintük wako anepalutsü
8. PWD (R& B) ajanga Public Ground tashi aoba lenmang reprangshimtsü.
9. DRDA-i Welcome Gate yanglutsü.
10. DPRO ajanga PA System anepalutsü.
11. Electrification- EE Power Department
12. Travel Escort- Hd. DB
13. Security Arrangements-

SP, Police Department
14. Medical Care- CMO Medical Department
15. Refreshment Supervision- EAC Among
16. Overall Supervision Management- ADC HQ.
17. Retreat- DEF Kiphire Kasa senden nung, Covid-19 vaccine anaprongla mesüra mezüng dose agir alirtem iba sentong nung aruagi adentsüla, ta teloki lemtet. August 09 nungi tenzükaga August 14, 2021 tashi Kiphire jila nung "Free Medical Check-up" ayongzüktsü asoshi telok bangjemtepa liasü aser iba sentong atema CMO Kiphire dang metetdaksüogo. Ano, kaketshirtem atema essay writing/ painting / speech competition ayongzüktsü asoshi teloki renem aser iba tetoktepa ya ZPC Complex, Kiphire nung ayonga agitsü.

Iba den bendenloksema, August 14, 2021 nü Kiphire jila nung nübodok mapa ayongzüktsü asoshi züngsemtemi lemtet. Jila tesemtem, Sorkar Office, department quarter aser ward balala nung nübudok mapa ayonga agitsü.

District Nodal Officer

NTCP Kiphire, Dr. N. Moa Jamir-i 'No Tobacco awareness - Smoke free District Headquarter' nung PowerPoint presentation agütsü aser Independence Day sentong agiba mapang, tongti tesemdangeri iba campaign lapoktsütsü ta pai telok dang metetdaksü.

Dr. Moa Jamir-i ashiba agi, temesepba chiyongtsü achi-ajemba inyakyim ajak nokdangtsü/samatsütsü nükjidong nung Sorkari iba sentong tenzüktsüogo.

Maneni, iba senden agiba mapang, Board nung züngsem tasen - DFO Kiphire, Chisayi IFS aniokba telok dang metetpeladaksü; aser August 14, 2021 nü süngdong atemba sentong maparen achaayangtsü atema pa nem mapa lemezüktsü liasü.

Deputy Commissioner, Wati Aier-i, SOPs tetuyuba nung anidaka iba sentong nung adentsü asoshi sorkar wadang nung inyaker staff ajak dang metetdaksüogo. August 15, 2021 nü Independence Day sentong agiba mapang, Kiphire nungi 'Team Infinite Nagas' ta nungja agütsüba telok kati shilem agitsü.

Tokyo Olympics: Bronze play-off nung India tetsür hockey team tsükogo

Tokyo, Luroi/August 06, 2021 (Agencies): Tang asaya aliba Tokyo Olympics nung, India tetsür hockey team-i mezüng Olympic medal takok angutsü teimla aser mangdang mataloktet tembangogo. Hokolbarnü, tetsür hockey 'bronze play-off match' nung India team-i goal 3-4 agi Great Britain makok.

India tetsür hockey team-i taküm Olympics nung junga shilem agiogo aser otsüsüsüsa parnoki iba Games nung mezüng semifinal tongtet. Ajisiüaka, 2016 Rio Games nung gold medal takok angur aser world no. 4 team Great Britain-i India tsükdaksüba ajanga mezüng Olympic medal takok angutsü teimla samadok.

Brehostibarnü, kasa asayamung tebur hockey bronze play-off match nung, India tebur hockey team-i goal 5-4 agi Germany tsükdaksüba sülen, Hokolbarnü India tetsür hockey team tasembuba jenjang atema asaya liasü. Küm 41 sülen, Tokyo Games nung, India tebur hockey team-i mezüng medal kokogo.

India tetsür team-i kanga

junga asaya tenzük aser par teloki goal 2 agi Britain ajateta half time nung parnok goal 3-2 agi Britain tejakdang kumadok.

Ajisiüaka, tanabuba half nung, Great Britain team-i iba asaya akoktsü temulungtetba tulu nung bendanga agütsür asaya aser parnoki goal ana tashi atonga idakja India team tsükdaksü.

Iba asaya nung, India team-i minute pungo tsüngda goal asem tashi idaktsü. India team atema Gurjit Kaur (minute 25buba, 26buba) aser Vandana Katariya (minute 29buba) nati goal idaktsü.

Kasa asaya nung, Great Britain tetsür team atema Elena Rayer (16th), Sarah Riobertson (24th), captain Hollie Pearne-Webb (35th) aser Grace Baldson (48th) nungeri goal ka ka idakja liasü.

1980 Moscow Games asayamung nunga taoba India tetsür hockey team-i jenjang Games nung, hockey team trok dang shilem agia round-robin format nung toktep asünung, iba asayamung nung semi final masaya aser temaba team ana final asaya liasü.

UK nung Nawaz Sharif... (Tapak 8 nungi...)

Sharif ya tang tashi visa atsülanga lia arur südi, ta amanger.

Tang aliba Sharif indang UK visa ya kodang tashi alitsüar mejangja, ta osang ajanga ashi. UK Home Office indang totuyuba ya yimtenren tsütsü kangadang tashi tulu aliba Sharif'er kibong asoshi tezüdangtsü osang ka lir, aser tzüzüng-ozüng tsütsü takotet nübutemi pa temang majungba yong UK nung alitsü kuli tajung lir, ta amanger.

UK nung Sharif timtem majuru temang anepalutsü atema party-i obendangba tsütsü mera ajunga amshitsü, ta Sharif indang odongtar Mohammad Zubair-i ashi.

UK nung amenoka aliba immigration lawyer Hateem Ali-i Geo News den jembiba mapang, "Taoba mapang aruba indang visa atsülangba ya medical tsütsü (iba onük nungya mesük amai lir) asünungbo, nai yimya agi ita 18 tashi atsülangtetsü. Iba onük nung Home Office ajanga yangji ajemdaker atsülangtsü memolunger amai ajiteter," ta ashi.

Item inyakyim ajunga ya jembishitetsü, saka ita 12 tashinung tejangja metetsü, ta pai ashi.

Tashidak wara tamajung ya ajanga immigration tribunal nung ken o aika bendena lir, anungji Sharif ken o nung obendang agütsütsü asoshi küm ka mesüra tali agitsü akok, aser iba mapang tashi pa UK nung alitsü imlar, ta ano kari ashir.

Avenfield properties aser Al-Azizia Steel Mills ochimashi ken o nung aija alisang Sharif-i pa anema ken o benoka aliba jembitsü asoshi Islamabad High Court dangi maruba ajanga 2019 küm December ita pa ya metetsümonga aibelener ka lir, ta kasa court ajanga sangdonga liasü.

Pa indang rongsen aruba lenmang dang alia rongsen madak kibur asüba yong Pakistan nung aliba accountability court ka ajanga 2018 küm Sharif ya küm 10 tepuokdak ayutsü obendang agütsü aser Avenfield ken o bushisüngdangba nung amalitep makaba mechi küm ka tepuokdak ayutsü obendang agüja liasü.

Kasa küm Al-Azizia Steel Mills ochimashi ken o nung pa küm tenet tepuokdak ayutsü obendang agütsü, kong ozüng alema senotsü indokba putet. Item temerenshi ajunga ya atongtepa agitsü lir.

BILEMDANGANG

"Alima nung tamajunger tejenbullen lenmang maka."